

ARLeF: La lenghe e conte!

Il 21 di Fevrâr e je la Zornade Internazionâl de Lenghe Mari. E je stade inviade une campagne sui sociâl par diventâ Ambasadôrs de lenghe mari.

La ARLeF (Agjenzie Regionâl pe Lenghe Furlane) e ricuarde che ai **21 di Fevrâr** si celebre la **Zornade internazionâl de Lenghe Mari**, istituide de Unesco intal 1999 par promovi la diversitât linguistiche e culturâl e il multilinguism, ponts centrâi de ativitât istituzionâl de Agjenzie.

La date e je stade sielte par visâsi dai 21 di Fevrâr dal 1952, cuant che cuatri students bengalês de Universitât di Dacca a son stâts copâts des fuarcis di polizie dal Pakistan (che in chês volte al cjapave dentri ancje il Bangladesh) intant che a protestavin pal ricognossiment dal bengalês tant che lenghe uficiâl. Il teme sielt pe edizion di chest an al rimarce il leam profont che al esist tra lis biografis linguistiche di ogni frut e fantat e la riessude scolastiche. Il teme al è di fat: "La inclusion inte educazion e midiant de educazion. La lenghe e conte". A chest fin, l'innomenât linguist Tullio De Mauro che di pôc nus à lassât, al scriveve: "La lenghe mari che cun chês o sin nassûts e o vin imparât a orientâsi intal mont no je une manece, un strument che si dopre e che si bute vie. Cheste e infuartis la nestre vite psicologjiche, i nestris ricuarts, associazions, schemis mentâi".

Pe ocasion, e je tacade ancje une sfide gnove e divertente sui social media par diventâ Ambasadôrs de lenghe mari e par promovi e celebrâ su internet la diversitât culturâl e linguistiche cuntune particolâr atenzion aes lenghis di minorance, indigenis e in vie di estinzion.

Par aderî, al baste creâ un *meme* originâl par furlan, zontâ l'*hashtag* #MemeML e #Furlan, publicâlu su Facebook, Instangram o Twitter e multiplicâ lis condivisionis e i coments.

A chest colegament si puedin cjatâ dutis lis informazions e lis indicazions **par partecipâ ae sfide**: <https://furmeme.ml.wordpress.com/>. La ARLeF, di bande sô, e à za creât 8 *memes* par furlan che si puedin discjariâ dal so profil Facebook.

Udin, ai 20 di Fevrâr dal 2017

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<